



Meeqqat tamarmik tunngavimmigut assigiimmik tapisiaqartinneqarnissaat qulakkeerniarlugu, meeqqanut tapip allannqortiterneqarnissaa pillugu apeqquteqaat aallaavigalugu oqallinissamik siunnersuut

(Inatsisartunut ilaasortaq Anders Olsen, Siumut)

Anders Olsenip apeqquteqaat aallaavigalugu oqallinissamik siunnersuutaa imaattumik Inuit Ataqatigiinniit oqaaseqarfigissavarput.

Danmarkip naalagaaffiata tunngaviusumik inatsisai, nunatsinnut atuutilerneriniit ippassaq ukiut 64-inngortorsiorlugit nalliussineqartut paragrafiisa 75-iata immikkoortuisa aappaanni allassimasooq uanga nammineq nutsigara imaattoq issuarumavara:

“Kinaluunniit imminut ilaqtutaminulluunniit pilersorsinnaanngitsoq, allamillu pilersortissaqanngitsoq, pisortaniit ikiorneqarnissamat pisinnaatitaavoq, ikiorneqassagunili ikiuisarnermut inatsisini pisussaaffiliussat malissavai.”

Inuiaqatigiittut namminerisatsinnik tunngaviusunik inatsisitaanngikkallarnitsinni inatsisit tunngaviusut malitavut erseqqissaapput kinaluunniit sulineq atorlugu toqqissimanartumik inuuneqarumalluni imminut pilersussasoq, soorlu inatsimmi tunngaviusumi paragraf 75 immikkoortoq siullermi oqaatigineqartoq. Arlaannilli pissuteqarlutik sulisinnaanngitsut pisortaniit ikiorneqarsinnaatitaanerat inuiaqatigiit atugarissaarfiusut - tassa nammaqatigiiffiusut - ilisarnaatigisaat uaguttaaqq malit-taarput. Tassa, ikiortariaqartut ikiorneqassapput.

Isumaginninnermut inatsisini assigiinngitsuni tunngaviusartoq tassa - ikiorneqarnissaminnik pisari-aqartitsisut pisortanit ikiorneqartassapput.

Maannamullu meeqqanut tapit tamatuminna tunngaveqartuarsimapput - tassa kikkut pisari-aqartitsisut meeqqanut tapinik tunineqartassapput.

Tamatumalu saniatigut angajoqqaat tamarmik qitornaminnut pilersuisussaataapput.

Inuuniarnerli ima ilaannut ilungersunartigisarpoq ilaqtariit naammattumik inu-ussutissaqarsinnaasaratik. Taamaalilluni inatsisikkut tunngaviusukkut pisortanit ikiorneqarnissamik pisinnaatitaaffiit assigiinngitsut atuutilersarput - aamma meeqqanut tapisinissamik pisinnaatitaaffik taakkutulli atuutilersarpoq.

Taamaammat meeqqat tamarmik angajoqqaat isertitaat apeqqutaatinnagit assigiimmik tapeqartinneqassappata taava isumatoqaaq taanna aallaavigalugu ikiuineq - aamma meeqqanut tapeqartitsineq - tunngavissaajunnaassaaq. Tassa pisariaqartitsineq tunngaviginagu tunniussisoqartalissaaq, taamaallaat meeqqat assigiimmik pineqarnissaat kisimi tunngavilersuutinnagussalluni.

Immaqalu nunarput pissarissaartorsuanngorpat taamaaliorneq tunngavilersoruminarsissagalarpoq kikkut tamarmik nunatta pisuussutaanik pinsinnaatitaassammata - aamma meeqqat.

Kisianni paarlattuanik ajornartorsiuteqarpugut - tassa inuit ilaat pissarissaanneqqaat naak ilaat pissarissaaraluaqisut. Tassa inuiaqatigiinni atukkat assigiinneqqaat, naligiinnginneqqaat. Tamannalu naalakkersuisooqatigiinnissamik isumaqatigiissummi qanoq iliuseqarfiginiarneqarpoq. Ilaatigummi makkuninnnga allassimasoqarpoq.

“Atsiortut isumaqatigiipput inuiaqatigiit inuuniarnikkut atugaat naligiinnerusoq anguniarlugu suli-soqassasoq, taamaasilluni atukkat *naligiinnerulerlutik*, sumi najugaqarneq apeqputaatinnagu. Taamaasillugu atsiortut inuiaqatigiinni sutigut tamatigut nalingiinninnerup akiorneqarnissaa kissaatigaat.”

“Inuiaqatigiit atugarissaarnikkut nukittuumik inissisimasut ilaqutariit tunngavissaraat, *ikiorneqarnissamillu pisariaqartitsisut* ikiorneqarnissaat qulakkeertariaqarluni.”

Naligiinnginneq taama annertoreertigisoq pisariaqartitsisut pissaqareersullu assigiimmik tuniorarneqarnissaat assut tunngavilersoruminaappoq. Pisortanit tapersersugaasumik inuit ilaasa pitsaanusunik atugaqartitaanissaat eqqortuliornerunngilaq, naapertuilluarnerussanngilaq.

Assigiimmik pinninneq naligiimmillu pinninneq assigiinngillat. Angajoqqaq kisermaa ukiumut 180.000 kr-inik isertitalik kiisalu aappariit katillutik 700.000 kr.-inik isertitalit atugaat qanoq assigiinngitsigissasut imaasiinnarluta takorloorsinnaavarput. Kikkut arlaat taakkunani pisariaqartitsinersut takusinnaavarput.

Taamaammat oqallinneq manna pillugu Inuit Ataqatigiinniit oqaatigissavarput aningaasat kikkunut pisariaqartitsisunut atornissaat uagut piumanerugatsigu. Allatut iliorneq ilaqutariinnut pissarissaanngitsunut naapertuilluanngitsuliornerussaaq.